

O'ZBEKISTON RESPUBLIKASI VAZIRLAR MAHKAMASINING QARORI

UMUMTA'LIM FANLARINI BILISH DARAJASINI BAHOLASHNING MILLIY TEST TIZIMINI JORIY ETISH TO'G'RISIDA

O'zbekiston Respublikasi Prezidentining "2017 — 2021-yillarda O'zbekiston Respublikasini rivojlantirishning beshta ustuvor yo'nalishi bo'yicha Harakatlar strategiyasini "Ilm, ma'rifat va raqamli iqtisodiyotni rivojlantirish yili"da amalga oshirishga oid davlat dasturi to'g'risida" 2020-yil 2-martdagi PF-5953-son [Farmonida](#) belgilangan vazifalar ijrosini ta'minlash hamda abituriyentlarni oliy ta'lim muassasalariga o'qishga qabul qilish test sinovini takomillashtirish maqsadida Vazirlar Mahkamasi qaror qiladi:

1. Quyidagilar:

2020-yil 1-dekabrda boshlab bosqichma-bosqich bakalavriat ta'lim yo'nalishlariga mos fanlar majmuasidagi umumta'lim fanlaridan (keyingi o'rinlarda — umumta'lim fanlari) bilish darajasini baholashning milliy test tizimi;

2021/2022 o'quv yili qabulidan boshlab tegishli umumta'lim fanini (chet tili bundan mustasno) bilish darajasi to'g'risida davlat namunasidagi sertifikatga ega bo'lgan abituriyentga sertifikatdagi o'zlashtirish foiziga mos ravishda oliy ta'lim muassasasi bakalavriatiga o'qishga qabul qilish bo'yicha test sinovlarida ushbu fandan belgilangan maksimal ballga nisbatan tabaqalashtirilgan (proporsional) ball berish tartibi joriy etilsin.

2. Belgilansinki, umumta'lim fanlari bo'yicha sertifikatlash quyidagi muddatlarda joriy etiladi:

2020-yil 1-dekabrda ona tili va adabiyot (o'zbek tili va adabiyoti, rus tili va adabiyoti, qoraqalpoq tili va adabiyoti) hamda matematika fanlari bo'yicha;

2021-yil 1-fevralda kimyo va biologiya fanlari bo'yicha;

2022 — 2024-yillarda fizika, geografiya va tarix fanlari bo'yicha.

Umumta'lim fanlaridan bilish darajasini baholashning milliy test sinovlarini tashkil etish va umumta'lim fanlari bo'yicha sertifikatlash O'zbekiston Respublikasi Vazirlar Mahkamasi huzuridagi Davlat test markazi yoki qonunchilikda belgilangan tartibda tashkil etilgan ta'lim sifatini baholash bo'yicha tashkilot tomonidan amalga oshirilsin.

[Oldingi tahrirga qarang.](#)

2¹. Milliy sertifikatning tegishli darajasiga ega matematika fani o'qituvchilariga (Ixtisoslashtirilgan maktablarning matematika fani o'qituvchilaridan tashqari) ular faoliyat olib borayotgan davlat ta'lim muassasasining joylashuviga qarab, bazaviy tarif stavkasiga nisbatan shahar hududida joylashgan maktablarda 25 foiz, qishloq hududida joylashgan maktablarda 50 foizgacha har oylik ustama haq to'lanadi.

(2¹-band O'zbekiston Respublikasi Vazirlar Mahkamasining 2021-yil 15-oktabrdagi 646-sonli [qaroriga](#) asosan kiritilgan — Qonunchilik ma'lumotlari milliy bazasi, 16.10.2021-y., 09/21/646/0963-son)

[Oldingi tahrirga qarang.](#)

3. Umumta'lim fanlarini bilish darajasini aniqlash va davlat namunasidagi sertifikatni berish uchun tuziladigan test savollari davlat ta'lim standartlariga mos ravishda hamda ta'lim o'quv dasturiga muvofiq Vazirlar Mahkamasi huzuridagi Davlat test markazi tomonidan ishlab chiqiladi.

(3-band O'zbekiston Respublikasi Vazirlar Mahkamasining 2022-yil 2-avgustdagi 425-sonli [qarori](#) tahririda — Qonunchilik ma'lumotlari milliy bazasi, 03.08.2022-y., 09/22/425/0712-son)

4. Quyidagilar:

umumta'lim fanlaridan bilish darajasini baholash bo'yicha test sinovini tashkil etish hamda uning natijalari bo'yicha davlat namunasidagi sertifikatni berish tartib-taomillarini belgilovchi Umumta'lim fanlaridan bilish darajasini aniqlash va sertifikat berish tartibi to'g'risidagi nizom [1-ildovaga](#) muvofiq;

Umumta'lim fanini bilish darajasi to'g'risidagi sertifikatning davlat namunasi [2-ilovaga](#) muvofiq tasdiqlansin.

5. O'zbekiston Respublikasi Xalq ta'limi vazirligi Oliy va o'rta maxsus ta'lim vazirligi, Adliya vazirligi, Yoshlar ishlari agentligi, Vazirlar Mahkamasi huzuridagi Ta'lim sifatini nazorat qilish inspeksiyasi bilan birgalikda ta'lim sifatini baholash bo'yicha faoliyat yuritadigan xalqaro ta'lim tashkilotlarini jalb qilgan holda umumiy o'rta ta'lim tashkilotlarida o'qitish sifatini baholashga muqobil shakllarni tatbiq etish maqsadida "Bilim va ko'nikmalarni baholash markazi" nodavlat ta'lim tashkilotini tashkil qilish yuzasidan bir oy muddatda Vazirlar Mahkamasiga taklif kiritsin.

Bunda "Bilim va ko'nikmalarni baholash markazi" nodavlat ta'lim tashkilotining asosiy faoliyat yo'nalishlari etib quyidagilar belgilansin:

xalqaro e'tirof etilgan ta'lim sifatini baholash metodikasidan kelib chiqqan holda umumta'lim maktablarida ta'lim sifatini baholashning zamonaviy usullarini ishlab chiqish;

umumiy o'rta ta'limda berilayotgan bilim va ko'nikmalar sifatini tizimli baholash uchun nazorat ishlari materiallarini ishlab chiqish;

ta'lim sifatini baholash bo'yicha dasturiy mahsulot ishlab chiqish;

O'zbekiston Respublikasi ta'lim sohasidagi vakolatli davlat boshqaruvi organlari hamda nodavlat ta'lim tashkilotlari va muassasalari buyurtmasiga ko'ra saralash, qabul qilish va yakuniy imtihonlarni o'tkazish;

ta'lim muassasalarida pedagogik faoliyat olib borish huquqini beruvchi ta'lim litsenziyalari va sertifikatlarini joriy etish.

6. O'zbekiston Respublikasi Hukumatining ayrim qarorlariga [3-ilovaga](#) muvofiq o'zgartirishlar va qo'shimcha kiritilsin.

7. O'zbekiston Respublikasi Vazirlar Mahkamasi huzuridagi Davlat test markazi manfaatdor vazirliklar va idoralar bilan birgalikda o'zlari qabul qilgan normativ-huquqiy hujjatlarni bir oy muddatda ushbu qarorga muvofiqlashtirsin.

8. Mazkur qarorning bajarilishini nazorat qilish O'zbekiston Respublikasi Bosh vazirining ijtimoiy rivojlantirish masalalari bo'yicha o'rinbosari B.A. Musayev zimmasiga yuklansin.

O'zbekiston Respublikasining Bosh vaziri A. ARIPOV

Toshkent sh.,
2020-yil 12-oktabr,
646-son

Vazirlar Mahkamasining 2020-yil 12-
oktabrdagi 646-son [qaroriga](#)
1-ILOVA

Umumta'lim fanlarini bilish darajasini aniqlash va sertifikat berish tartibi to'g'risida

NIZOM

1-bob. Umumiy qoidalar

1. Ushbu Nizom umumta'lim fanlarini bilish darajasini aniqlash va davlat namunasidagi sertifikatni berish tartibini belgilaydi.

2. Umumta'lim fanlarini bilish darajasini aniqlash va davlat namunasidagi sertifikatni (keyingi o'rinlarda — sertifikat) berish O'zbekiston Respublikasi Vazirlar Mahkamasi huzuridagi Davlat test markazi (keyingi o'rinlarda — Davlat test markazi) tomonidan to'lov asosida amalga oshiriladi, sertifikat elektron shaklda beriladi.

Sertifikat berish uchun talabgordan ariza berilgan kundagi bazaviy hisoblash miqdorining 1,5 baravari miqdorida to'lov undiriladi.

Umumta'lim fanlarini bilish darajasini baholashning milliy test tizimida ishtirok etish uchun talabgordan undiriladigan to'lov Davlat test markazining budjetdan tashqari hisobvarag'iga tushadi.

Sertifikat test sinovi natijasi bo'yicha eng yuqori ballning kamida 60 foizini to'plagan shaxslarga 3 yil muddatga beriladi.

[Oldingi tahrirga qarang.](#)

Bunda, eng yuqori ballning 60 foizdan 85 foizigacha to'plagan abituriyentga sertifikatdagi o'zlashtirish foiziga mos ravishda oliy ta'lim muassasasi bakalavriatiga o'qishga qabul qilish bo'yicha test sinovlarida ushbu fandan belgilangan maksimal ballga nisbatan tabaqalashtirilgan (proporsional) hamda 86 foiz va undan yuqori ball to'plagan abituriyentga eng yuqori ball beriladi.

Milliy sertifikatga ega bo'lgan abituriyentga tegishli majburiy fanlar bo'yicha belgilangan eng yuqori ball beriladi.

(2-band O'zbekiston Respublikasi Vazirlar Mahkamasining 2022-yil 2-avgustdagi 425-sonli [qaroriga](#) asosan xatboshilar bilan to'ldirilgan — Qonunchilik ma'lumotlari milliy bazasi, 03.08.2022-y., 09/22/425/0712-son)

3. Chet tilini bilish darajasini baholash va malaka sertifikatini berish Vazirlar Mahkamasining 2013-yil 31-dekabrdagi 352-son qarori bilan tasdiqlangan Chet tilini bilish darajasini aniqlash va malaka sertifikatini berish tartibi to'g'risidagi [nizomga](#) muvofiq amalga oshiriladi.

4. Umumta'lim fanlarini bilish darajasi O'zbekiston Respublikasi uzluksiz ta'lim tizimining davlat ta'lim standartlariga muvofiq shakllantiriladigan pedagogik o'lchov vositalari asosida test sinovlari yordamida baholanadi.

[Oldingi tahrirga qarang.](#)

Umumta'lim fanlarini bilish darajasini aniqlash va davlat namunasidagi sertifikatni berish uchun tuziladigan test savollari davlat ta'lim standartlariga mos ravishda hamda ta'lim o'quv dasturiga muvofiq Vazirlar Mahkamasi huzuridagi Davlat test markazi tomonidan ishlab chiqiladi.

(4-bandning ikkinchi xatboshisi O'zbekiston Respublikasi Vazirlar Mahkamasining 2022-yil 2-avgustdagi 425-sonli [qarori](#) tahririda — Qonunchilik ma'lumotlari milliy bazasi, 03.08.2022-y., 09/22/425/0712-son)

Test sinovlari abituriyentlarning tayyorgarlik darajasini tizimli va asosli baholash uchun yaratilgan, turli shakl va qiyinlik darajasidagi parallel topshiriqlar tizimini nazarda tutadi.

2-bob. Umumta'lim fanlarini bilish darajasini aniqlash bo'yicha test sinovini tashkil etish tartibi

5. Umumta'lim fanlari bo'yicha test topshiriqlari formati (fan mazmuni tarkibi, savollar soni, topshiriqlar turi, vaqt me'yori), baholash mezonlari, test sinovining o'tkazilishi muddatlari, shuningdek, talabgor tomonidan to'ldiriladigan ariza shakli Davlat test markazi tomonidan tasdiqlanadi va uning rasmiy veb-saytiga joylashtiriladi.

6. Talabgor sertifikat olish maqsadida test sinovida qatnashish uchun "Abituriyentlar ma'lumotlari va arizalarini ro'yxatga olish tizimi" orqali elektron ariza berib ro'yxatdan o'tadi.

7. Ro'yxatdan o'tish quyidagi hujjatlar asosida amalga oshiriladi:

shaxsni tasdiqlovchi hujjat: fuqarolik pasporti (fuqarolik pasporti bo'lmagan taqdirda tug'ilganlik to'g'risidagi guvohnoma yoki fuqaroligi bo'lmagan shaxsning yashash guvohnomasi) yoki ID kartasi;

3,5 x 4,5 sm o'lchamli oq fondagi rangli fotosuratning elektron shakli (tug'ilganlik to'g'risidagi guvohnoma yoki fuqaroligi bo'lmagan shaxsning yashash guvohnomasi bilan murojaat qilganda).

Talabgor uchun Davlat test markazining rasmiy veb-saytida shaxsiy kabinet yaratiladi.

Talabgor to'lovni amalga oshirgandan so'ng u ro'yxatdan o'tgan va Davlat test markazi bilan ommaviy oferta shartnomasi tuzilgan hisoblanadi.

Qayd etilgan hujjatlardan birortasi mavjud bo'lmasa, tizim hujjatlarni qabul qilishni rad etadi.

Talabgor haqidagi ma'lumotlarning to'g'riligiga talabgorning o'zi shaxsan javobgar hisoblanadi.

[Oldingi tahrirga qarang.](#)

8. Davlat test markazi tomonidan talabgor to'g'risidagi shaxsga doir ma'lumotlar maxfiyligi ta'minlanadi. Qonunchilik hujjatlarida belgilangan tartibda huquqni muhofaza qiluvchi organlar va sud tomonidan rasmiy murojaat bo'lgan taqdirda, ariza beruvchilar to'g'risidagi ma'lumotlar taqdim etiladi.

(8-band O'zbekiston Respublikasi Vazirlar Mahkamasining 2022-yil 4-apreldagi 153-sonli [qarori](#) tahririda — Qonunchilik ma'lumotlari milliy bazasi, 05.04.2022-y., 09/22/153/0266-son)

9. Test sinovini o'tkazish joyi va sanasi Davlat test markazi tomonidan belgilanadi.

Test sinovini o'tkazish sanasi u o'tkaziladigan kundan kamida yetti kun oldin e'lon qilinadi.

Talabgor test sinovi o'tkaziladigan sana va joy to'g'risidagi ma'lumotga o'zining shaxsiy kabineti orqali ega bo'ladi.

10. Talabgorning test sinovida belgilangan o'tirish o'rni Davlat test markazi tomonidan qur'a tashlash yo'li bilan aniqlanadi va dalolatnoma rasmiylashtiriladi.

11. Test sinovi blankalarda yoki kompyuter (onlayn platforma)da o'tkazilishi mumkin. Test sinovi Davlat test markazi tomonidan tasdiqlangan imtihon komissiyasi a'zolari va kuzatuvchilar ishtirokida o'tkaziladi.

Imtihon komissiyasi yozma yoki og'zaki test sinovlari belgilanganda shakllantiriladi.

Imtihon komissiyasi tarkibi Davlat test markazi direktorining buyrug'i bilan tasdiqlanadi, unga Davlat test markazi xodimlari va tajribali pedagoglar, malakali mutaxassislar kiritiladi.

Test sinovi tegishli dasturiy ta'minot asosida kompyuterda o'tkazilganda bilimni baholashning barcha bo'limlari qamrab olingan holda bir bosqichda amalga oshiriladi.

12. Test sinovi Davlat test markazi mas'ul xodimining rahbarligida va kuzatuvda o'tkaziladi.

Test sinovlari maxsus jihozlangan, videokuzatuv bilan ta'minlangan holda Davlat test markazi vakilining nazorati ostida onlayn o'tkazilishi mumkin.

Test sinovi vaqtida har bir ish joyida bir nafar talabgor o'tiradi. Test sinovini o'tkazish jarayoni doimiy videotasvirga olinadi.

13. Test sinovini o'tkazish uchun kuzatuvchilar jalb etilishi mumkin.

14. Test sinoviga jalb etilgan imtihon komissiyasi a'zolari va kuzatuvchilar bilan shartnoma tuziladi.

15. Talabgor shaxsini tasdiqlovchi hujjat asosida video qayd etish qurilmalari orqali tekshirishdan o'tgach test sinoviga qo'yiladi.

16. Test sinovi o'tkazilayotgan auditoriyaga har qanday qo'llanma, adabiyotlar, telekommunikatsiya va texnika vositalarini olib kirish qat'iyan man etiladi. Test sinovini o'tkazish jarayoniga turli xatti-harakatlar bilan salbiy ta'sir qilish: boshqa talabgorlar bilan muloqot qilish, savollar kitobi varaqlarini yirtish, savollar kitobini boshqa talabgorlarga berish, test sinoviga ajratilgan vaqt tugagandan so'ng yozishni davom ettirish, boshqa talabgorga birorta buyum uzatish taqiqlanadi.

Ushbu talablarga rioya qilmagan talabgor sinovdan dalolatnoma bilan chetlashtiriladi. Chetlashtirish dalolatnomasi imtihon komissiyasi raisi va Davlat test markazining test sinovini kuzatib boruvchi mas'ul xodimi tomonidan rasmiylashtiriladi.

Chetlashtirish dalolatnomasi natijalarning hisoblanmasligiga asos bo'ladi.

17. Test sinovlari natijalari ular yakunlangan kundan boshlab yigirma ish kunidan kechikmay Davlat test markazining rasmiy veb-saytida e'lon qilinadi.

3-bob. To'lov shartlari

18. To'lov talabgor tomonidan amaldagi elektron to'lov tizimlari orqali ariza berilgan kundan boshlab uch kun mobaynida amalga oshiriladi.

To'lov to'g'risidagi ma'lumotni talabgor o'zining shaxsiy kabineti orqali biladi.

19. Agar ariza beruvchi turli sabablarga ko'ra test sinovlarida ishtirok eta olmaydigan bo'lsa, Davlat test markaziga test sinovlari o'tkaziladigan kundan kamida uch kun oldin yozma va elektron shaklda murojaat etishi lozim.

Uzrli sababga ko'ra (kasalligi yoki oila a'zolarining vafot etganligini tasdiqlovchi hujjatni taqdim etganda) test sinovlarida qatnasha olmagan talabgor test sinovi boshlangan kundan boshlab besh ish kuni mobaynida ushbu holatni tasdiqlovchi hujjatlarni Davlat test markaziga bevosita yoki elektron tarzda taqdim etishi lozim.

Bunda talabgorning arizasiga muvofiq navbatdagi test sinovlariga kiritilishi ta'minlanadi yoki to'langan to'lov to'liq miqdorda talabgorga qaytariladi.

20. Talabgor test sinoviga kechikkan yoki sababsiz kelmagan hollarda, uning arizasiga binoan talabgor tomonidan amalga oshirilgan to'lovning 50 foiz miqdori qaytariladi.

21. Test sinovi o'tkazilishi jarayonida talabgor bir vaqtda faqat bitta umumta'lim fanidan test topshirishiga ruxsat etiladi.

4-bob. Apellatsiyalarni ko'rib chiqish tartibi

22. Test natijalaridan norozi bo'lgan talabgor test sinovi natijalari e'lon qilingan kundan boshlab besh ish kuni mobaynida Davlat test markaziga ushbu Nizomga [1-ilovaga](#) muvofiq yozma yoki elektron shaklda apellatsiya berish huquqiga ega.

23. Apellatsiyani ko'rib chiqish uchun Davlat test markazi direktorining buyrug'i bilan 5 yoki 7 nafar Davlat test markazi xodimlari (umumiy komissiya a'zolari sonining o'ttiz foizidan oshmagan holda) va ta'lim tizimi pedagoglaridan iborat bo'lgan Apellatsiya komissiyasi tuziladi.

Apellatsiya komissiyasi tarkibiga Imtixon komissiyasi a'zolari kiritilmaydi.

Apellatsiya ikki hafta mobaynida ko'rib chiqiladi. Talabgor Apellatsiya komissiyasi qarori to'g'risida yozma yoki elektron shaklda xabardor qilinadi.

24. Apellatsiyani ko'rib chiqish natijalari bo'yicha quyidagi qarorlardan biri qabul qilinadi:

test sinovi natijalarini o'zgarishsiz qoldirish va apellatsiyaning qanoatlantirilishini rad etish;

test sinovlari natijalarini o'zgartirish va apellatsiyani qanoatlantirish.

Agar talabgor tomonidan ko'rsatilgan dalillar tasdiqlanmasa, apellatsiyaning qanoatlantirilishini rad etish to'g'risida qaror qabul qilinadi.

Agar talabgor tomonidan ko'rsatilgan dalillar asosli deb topilsa, apellatsiya komissiyasi qarori bilan test natijalari o'zgartiriladi.

Apellatsiya komissiyasining qarorlari ushbu Nizomga [2-ilovaga](#) muvofiq shaklda rasmiylashtiriladi.

25. Takroriy apellatsiyaga yo'l qo'yilmaydi.

[Oldingi tahrirga qarang.](#)

Talabgor Apellatsiya komissiyasining qarori yuzasidan qonunchilik hujjatlarida belgilangan tartibda sudga shikoyat qilishi mumkin.

(25-bandning ikkinchi xatboshisi O'zbekiston Respublikasi Vazirlar Mahkamasining 2022-yil 4-apreldagi 153-sonli [qarori tahririda](#) — Qonunchilik ma'lumotlari milliy bazasi, 05.04.2022-y., 09/22/153/0266-son)

5-bob. Umumta'lim fanlarini bilish darajasini baholashning davlat namunasidagi sertifikatini berish tartibi

26. Sertifikat test sinovidan ijobiy natijaga erishgan talabgorga test sinovi natijalari e'lon qilingan kundan boshlab bir hafta mobaynida Davlat test markazi direktorining buyrug'i asosida elektron shaklda beriladi. Talabgor sertifikatni shaxsiy kabinetini orqali yuklab olishi mumkin.

27. Sertifikatlar reyestri Davlat test markazi tomonidan yuritiladi.

Sertifikatlar reyestrda quyidagilar ko'rsatilishi lozim:

talabgorning familiyasi, ismi, otasining ismi;

pasport ma'lumotlari (seriyasi va tartib raqami, pasportning kim tomonidan va qachon berilganligi) yoki tug'ilganlik to'g'risidagi guvohnoma ma'lumotlari (tartib raqami, guvohnomaning kim tomonidan va qachon berilganligi);

Davlat test markazining sertifikat berish to'g'risidagi buyrug'ining sanasi va tartib raqami;

sertifikatning hisobga olish seriyasi va tartib raqami;

sertifikatning berilgan sanasi;

sertifikatning amal qilish muddati.

28. Sertifikatning haqiqiyliги to'g'risidagi ma'lumotlarni Davlat test markazining rasmiy veb-sayti orqali tekshirish imkoniyati yaratiladi.

6-bob. Yakunlovchi qoidalar

[Oldingi tahrirga qarang.](#)

29. Ushbu Nizomni qo'llashda yuzaga keladigan nizolar qonunchilik hujjatlarida belgilangan tartibda hal etiladi.

(29-band O'zbekiston Respublikasi Vazirlar Mahkamasining 2022-yil 4-apreldagi 153-sonli [qarori tahririda](#) — Qonunchilik ma'lumotlari milliy bazasi, 05.04.2022-y., 09/22/153/0266-son)

[Oldingi tahrirga qarang.](#)

30. Ushbu Nizom talablarining buzilishida aybdor bo'lgan shaxslar qonunchilik hujjatlarida belgilangan tartibda javob beradilar.

(30-band O'zbekiston Respublikasi Vazirlar Mahkamasining 2022-yil 4-apreldagi 153-sonli [qarori tahririda](#) — Qonunchilik ma'lumotlari milliy bazasi, 05.04.2022-y., 09/22/153/0266-son)

Vazirlar Mahkamasining 2020-yil 12-
oktabrdagi 646-son [qaroriga](#)
2-ILOVA

**Умумтаълим фанини билиш даражаси тўғрисидаги
сертификатнинг давлат намунаси**

Ўзбекистон Республикаси Давлат герби

O'ZBEKISTON RESPUBLIKASI VAZIRLAR MAHKAMASI HUZURIDAGI
DAVLAT TEST MARKAZI

**UMUMTA'LIM FANINI BILISH DARAJASI
TO'G'RISIDA SERTIFIKAT**

Sertifikat raqami:

Talabgorning shaxsiy kodi:

Familiyasi:

Ismi:

Otasining ismi:

Umumta'lim fani:

Umumiy to'plagan bali:

Umumiy ballga nisbatan
foiz ko'rsatkichi:

Bo'limlar
bo'yicha test
sinovi natijalari:

Berilgan sanasi:

Amal qilish muddati:

Direktor

Imzo

F.I.O.

(tavsifi)

Umumta'lim fanlari bo'yicha bilish darjasini baholash to'g'risida sertifikat A4 formatdagi oq qog'ozga ofset usulida bosiladi. Bunda beshta rangdan foydalaniladi: qora rang — matn uchun, yashil, ko'k, qizil ranglar — rasmlarni tasvirlash uchun, och jigarrang — fon uchun. Varaqning yuqori qismida 25 mm diametrda Davlat gerbi joylashtirilgan.

Varaqlarning qolgan qismiga davlat tilida lotin yozuvida "O'ZBEKISTON RESPUBLIKASI VAZIRLAR MAHKAMASI HUZURIDAGI DAVLAT TEST MARKAZI. UMUMTA'LIM FANINI BILISH DARAJASINI

BAHOLASH TO'G'RIDA SERTIFIKAT" so'zlari bosiladi. Sertifikat olti raqamli tartib raqamiga egadir.

Vazirlar Mahkamasining 2020-yil 12-oktabrdagi 646-son qaroriga
3-ILOVA

O'zbekiston Respublikasi Hukumatining ayrim qarorlariga kiritilayotgan o'zgartirishlar va qo'shimcha

1. Vazirlar Mahkamasining 2017-yil 20-iyundagi 393-son qarori bilan tasdiqlangan Oliy ta'lim muassasalarining bakalavriatiga talabalarni o'qishga qabul qilish tartibi to'g'risidagi nizomning 15-bandiga quyidagi mazmundagi xatboshi qo'shilsin:

"Davlat test markazi tomonidan beriladigan umumta'lim fanini (chet tili bundan mustasno) bilish darajasi to'g'risidagi sertifikatga ega bo'lgan abituriyentlarga ushbu holatni tasdiqlovchi hujjatni qabul jarayonida taqdim etganda, sertifikatdagi o'zlashtirish foiziga mos ravishda oliy ta'lim muassasalari bakalavriatining kirish test sinovlarida ushbu umumta'lim fanidan belgilangan maksimal ballga nisbatan tabaqalashtirilgan (proporsional) ball beriladi hamda ular ushbu fandan test sinovi (kasbiy (ijodiy) imtihon) topshirmaydi".

2. Vazirlar Mahkamasining "O'zbekiston Respublikasi Vazirlar Mahkamasi huzuridagi Davlat test markazi faoliyatini yanada takomillashtirish to'g'risida" 2018-yil 20-fevraldagi 130-son qarorida:

a) 2-bandning to'rtinchi xatboshisidagi "chet tillarini" so'zlari "umumta'lim fanlarini" so'zlari bilan almashtirilsin;

b) 2-ilovada:

8-bandning 3-kichik bandidagi "chet tillarini" so'zlari "umumta'lim fanlarini" so'zlari bilan almashtirilsin;

9-bandning 3-kichik bandi quyidagi tahrirda bayon qilinsin:

"3) umumta'lim fanlarini bilish darajasini baholashning milliy test tizimini rivojlantirish sohasida:

xalqaro e'tirof etilgan baholash standartlari asosida umumta'lim fanlari bo'yicha test topshiriqlari tuzilmasini ishlab chiqish va sinovdan o'tkazish;

umumta'lim fanlarini bilish va egallash darajasini aniqlash bo'yicha xalqaro e'tirof etilgan baholash standartlari talablariga muvofiq to'lov asosida test sinovlarini o'tkazish;

rivojlangan mamlakatlarning tajribasiga tayangan holda umumta'lim fanini bilish ko'nikmalarini baholash mezonlarini ishlab chiqish va sinovdan o'tkazish;

oylik ish haqiga ustama belgilangan umumta'lim fanlari o'qituvchilarini ko'p komponentli test sinovlaridan o'tkazish;

umumta'lim fanlarini bilish darajasiga davlat namunasidagi sertifikatni berish;

umumta'lim fanlaridan test sinovlaridan o'tuvchi shaxslar uchun o'quv-metodik qo'llanmalarni ishlab chiqish va nashr qilish;

rivojlangan mamlakatlar tajribasini o'rganish asosida test sinovlari texnologiyasini takomillashtirish;

test materiallarini ishlab chiqishda hamda ulardan foydalanishda ta'lim muassasalariga va boshqa muassasalarga metodik yordam ko'rsatish".

3. Vazirlar Mahkamasining 2018-yil 3-apreldagi 261-son qarori bilan tasdiqlangan O'zbekiston Respublikasi oliy ta'lim muassasalarining bakalavriatiga o'qishga qabul qilish uchun kirish test sinovlarini o'tkazish tartibi to'g'risidagi nizomning 24-bandini yettinchi xatboshisi quyidagi tahrirda bayon qilinsin:

"maxsus dastur orqali bazaga maxsus kod, qayd raqami, ta'lim turi, ta'lim muassasasining nomi, abituriyentning fuqaroligi, familiyasi, ismi, otasining ismi, millati, jinsi, pasport seriyasi va raqami, yashash joyi, tug'ilgan yili va joyi, ijtimoiy kelib chiqishi, ta'lim olgan ta'lim muassasasi turi, raqami va nomi, manzili hamda uni tugatgan yili, diplom (shahodatnoma yoki uning o'rnini bosuvchi hujjat) raqami, belgilangan tartibda berilgan imtiyozlari haqida ma'lumot (agar ushbu imtiyozlar bo'yicha hujjatlar mavjud bo'lsa) hamda to'liq davlat ta'minotidagi yetim bolalar va ko'zi

ojizlar toifasiga kiruvchi shaxs to'g'risidagi ma'lumot, o'qitish tili, ixtisosligi, chet tili va uni topshirish usulini kiritish".

(Qonun hujjatlari ma'lumotlari milliy bazasi, 13.10.2020-y., 09/20/646/1382-son; Qonunchilik ma'lumotlari milliy bazasi, 16.10.2021-y., 09/21/646/0963-son; 05.04.2022-y., 09/22/153/0266-son; 03.08.2022-y., 09/22/425/0712-son)